

इवनिंग डोगरी न्यूज़ बुलेटिन

समे .1815

एह आकाशवाणी जम्मू ऐ, संजा खबरें च तुंदा सुआगत, पैहले खास-खास खबरें कन्नै में श्रुति खजूरिया।

<><><><><><>

Headlines

- 1 जम्मू संसदीय हल्के आस्तै 26एं मेदवारें अपने नामांकन पत्र दाखल कीते न।फ 6 अप्रैल गी इंदी जांच कीती जाग। 8 अप्रैल तोड़ी नामांकन पत्र वापस लैते जाई सकदे न ते 26 अप्रैल गी उत्थें वोट पाए जांगन।
- 2 चुनां आयोग ने वरिष्ठ नागरिकें ते दिव्यांगजनें आस्तै घरे थमां वोट पाने दी बवस्था शुरू कीती ऐ।
- 3 राष्ट्रपति द्रौपदी मुर्मू। होरें गीारत च पैहली बारी तैआर कीती गेदी इलाज मुआलजे दी पद्धति कार-टी थरैपी दी शुरूआत कीती।
- 4 मरीज दी बेहतर सहूलत आस्तै सेहत ते मैडिकल शिक्षा मैहकमे नै जम्मू कश्मीर ते डेंटल कालेजें च कम्मै दे ध्याड़े ते समें च बाद्धा कीता ऐ।

<><><><><><>

ते हून खबरें दी तफसील कन्नै नरेश शर्मा।

<><><><><><>

Nomination Phase-2

जम्मू पार्लिमानी हल्के लेई 26 मेदवारें अपना नामांकन भरेआ ऐ। इस हल्के च लोकसभा चुनाएं दे दुए गेड़ तैहत 26 अप्रैल गी वोट पाए जाने न। आकाशवाणी जम्मू संवाददाता दी रिपोर्ट मूजब मेदवारें अपना नामांकन जम्मू पार्लिमानी हल्के दे रिटर्निंग अफसर दे दफतरै च दाखल कीते। अज्ज नामांकन भरने दा खीरी दिन हा। नामांकन पत्रें दी जांच 6 अप्रैल गी कीती जाग। मेदवार अपना नामांकन 8 अप्रैल तगर वापस परताई सकदे न। 26 अप्रैल गी दुए गेड़ च होने आले चुनाएं च जम्मू पार्लिमानी हल्का 88 हल्के चा इक ऐ। जम्मू रियासी पार्लिमानी हल्के च त्रै जिले जम्मू सांबा ते रियासी ओंदे न। इत्थें कल मतदाताएं दी गिनतरी 17 लक्ख 67 ज्हार 837 ऐ। जिंदे च 9 लक्ख 15 ज्हार 10 मर्द ते 8 लक्ख 52 ज्हार 7 सौ 96 महिला मतदान दे 19 ट्रांसजंडर मतदाता न। इस लोकसभा हल्के लेई 2 ज्हार 4 सौ 16 मतदान केन्द्र बनाए गेदे न ते एहदे च विधानसभा दे 18 हल्के न।



Compaiging 1st Phase

लोकसभा चुनाएं आस्तै प्रचार तेज होंदा जा'रदा ऐ। प्रमुख सियासी पार्टिएं दे बड्डे नेता मुख्य भरै च जलसे ते रोड शो करै करदे न। प्रधानमंत्री ते भाजपा दे वरिष्ठ नेता नरेन्द्र मोदी होरें नमो ऐप राएं उत्तर प्रदेश च भाजपा दे वर्करें गी रैली गी डिजीटल तरीके राएं संबोधत कीता। उनें कार्यकत्प्राएं गी मतदान दे पिच्छले सब्बै रिकार्ड तरोड़ने दे निश्चे कन्नै कम्म करने लेई आक्खेआ। भाजपा दे वरिष्ठ नेता ते गृहमंत्री अमित शाह होरें उत्तर प्रदेश दी मुज्जफर नगर थाहरै इक चुनां रैली गी संबोधत कीता ते आक्खेआ जे प्रधानमंत्री मोदी होरें गरीबें ते करसानें आस्तै बड़ा मता कम्म कीता ऐ। तोआई कांग्रेस अध्यक्ष मल्लिकार्जुन खड़गे कल उत्तर-पूर्वी दिजजी संसदी हल्के थमां घर-घर गारंटी अभियान दी शुरूआत कीती ते आक्खेआ जे जेकर कांग्रेस दी सरकार बनी तां खाली पेदी थाहरें गी तौले पुर कीता जाग।



Election 2024

वरिष्ठ नागरिकें ते दिव्यांग लोकें आस्तै वोट पाने ताई मतदान केन्द्रें पर जाने आस्तै बड़ी मुश्कल पेश औंदी ऐं लम्मिएं रीगें च खड़ोना ते गर्मी झल्लना होर बी मता कठन होई जंदा ऐ। समावेशी लोकतंत्र जकीनी बनाने बक्खी इक गैह पुट्टदे होई चुनां आयोग नै लोकें आसतै घरै थमां वोट

पाने दी पैहलकदमी शुरू कीती ऐ। 82 लक्ख वरिष्ठ नागरिकें ते तकरीबन 88 लक्ख दिव्यांग ते लोकें आस्सेआ वोट पाने दी तैआरी गी दिक्खदे होई घरै थमां वोट देने दी इस पैहकदमी कन्नै एह जकीनी बनी सकोग जे कोई बी नागरिक मतदान प्रक्रिया थमां वंचित नेई रौहग। घरै थमां वोट पाने दा एह प्रावधान 85एं ब'रे थमां बद्ध उमरी दे व्यक्तिएं ते 40 फीसद जां फही एहदे थमां बद्ध विकजागता आले दिव्यांगजनें गी दित्ता जाग। मतदान प्रक्रिया गी पूरा करने आस्तै चुनां आयोग दे 2 अधिकारी, इक विडियोग्राफर ते सुरक्षाकर्मी योग्य मतदाता दे घर जांगन। एहदे अलावा चुनां आयोग सक्षम ऐपग गी बी बढ़ावा देआ'रदा ऐ जेहड़ी चुनां प्रक्रिया च दिव्यांगजनें गी सशक्त बनाने आस्तै तैआर कीती गेदी ऐ। इस ऐप च मतदाता पंजीकरण सरबंधी सहायता, मतदान केन्द्र दी स्थिति सरबंधी सेवा ते मतदान करने सरबंधी मागदर्शन उपलब्ध ऐ। एहदे अलावा आयोग आस्सेआ समावेशी लोकतंत्र ताई अपनी प्रतिबद्धता पूरी करदे होई स्वरा सेवी, विलचेयर ते ट्रांसपोर्ट सूहलतां बी उपलब्ध करोआइयां जा'रदियां न। विकलांगता दे बजाए योग्यता पर अपना ध्यान केन्द्रित करदे होई आयोग पास्सेआ हर वोट दे महत्व ते हर नागरिक दी शमूलियत दे महत्व उप्पर जोर दित्ता जा'रदा ऐ। घरै थमां वोट पाने दी सुविधा ते सक्षम ऐप कन्नै हर इक मतदाता लोकतांत्रिक प्रक्रिया च योगदान देइ सकदा ऐ ते भारत दी चुनां प्रणाली च अपना विश्वास प्रकट करी सकदा ऐ।

<><><><><><><><>

Udhampur SVEEP(byte)

उधमपुर दे जिला चुनां अधिकारी हुंदी हिदायत पर सिनियर सिटीजन क्लब उधमपुर स्वीप कार्यक्रम कराया गेआ। बड़ी मती गिनतरी च वरिष्ठ नागरिकें ते दिव्यांगजनें एहदे च हिस्सा लैता। प्रोग्राम दा मकसद वरिष्ठ नागरिकें ते दिव्यांग लोकें गी भारती चुनां आयोग पास्सेआ सहूलतें दी जानकारी देना हा। साढ़े जिला संवाददाता अचिन दूबे हुंदे कन्नै गल्ल करदे होई स्वीप उधमपुर दियां नोडल अफसर डॉ. प्रीती शम्र होरें दस्सेआ.....बाईट

<><><><><><><><>

Security Kathua

बक्ख-बक्ख राज्यें कन्नै लगदे बन्ने आले जिला कठुआ च 19 अप्रैल गी लोकसभा चुनां गी दिक्खदे होई सुरक्षा बंदोबस्त निगगर करी दित्ते गे न। पंजाब ते हिमाचल प्रदेश कन्नै जोड़ने आले कठुआ जिले दे नाके पर चौकसी बधाई दित्ती गेई ऐ ते आओने आलिएं गड्डिएं दी तलाशी लैती

जा'रदी ऐ। साढ़े जिला संवाददाता प्रदीप शर्मा हुंदे मूजब एसएसपी कठुआ शिदीप सिंह हुंदे मूजब 19 अप्रैल गी होने आले मतदान गी दिक्खदे होई सुरक्षा दे इंतजाम सख्त कीते गे न। अंतर राज्यी सीमाएं पर चौकसी बधाने लेई जिला इंतजामिया पाससेआ पंजाब ते हिमाचल प्रदेश दे प्रशासन कन्नै बी बैठक लाई गई ऐ।

<><><><><><>

ECI Fake Message

निर्वाचन आयोग नै सोशल मीडिया प्लेटफार्म वट्सऐप पर फैलाए जा'रदे झूठे ते अरमाने आले उस सनेह गी फर्जी करार दित्ता ऐ जेह्दे च आक्खेआ गोआ ऐ जे सरकारी कर्मचारी डाक मतपत्र राएं मतदान नेई करी सकदे। इक सोशल मीडिया पोस्ट च आयोग नै आक्खेआ ऐ जे चुनां ड्यूटी पर तैनात अधिकारी मतदाता सुविधा केन्द्र राएं डाक मतपत्र राएं मतदान करी सकदे न। आयोग नै लोकें थमां सौहगे रौहने ते फर्जी सनेहें थमां स्तक रौहने लेई गलाया ऐ। लोकें गी पुख्ता जानकारी लेई आयोग दी अधिकारिक वेबसाइट दिक्खने लेई आक्खेआ गोआ ऐ।

<><><><><><>

हुन खबरें दी तफसील कन्नै श्रुति खजूरिया।

<><><><><><>

President CAR-T

राष्ट्रपति द्रौपदी मुर्मू होरें अज्ज इंडियन इंस्टीच्यूट ऑफ टैक्नालोजी बाम्बे च. भारत च तैआर कीती गेदी इलाज मुआलजे दी पैहली कार-टी थरैपी दा उद्घाटन कीता। इस मौके पर बोलदे होई राष्ट्रपति होरें आक्खेआ जे इलाज गी इस सस्ती पद्धति कन्नै समूलची मानवता आस्तै इक नमीं मेद बज्झी ऐ। उनें मेद प्रकट कीती जे भारत दी पैहली जीन-थरैपी नेकां मरीजें गी नमां जीवन देने च सफल होग। राष्ट्रपति होरें आक्खेआ जे इस पद्धति कन्नै भारत आधुनिक इलाज दी सुविधा च विश्व दे नक्शे पर आई गोआ ऐ ते इस भलेयां नमीं टैक्नालोजी कन्नै सम्पन्न मुल्खें दी सूचि च शामिल होई गोआ ऐ।

<><><><><><>

H&MED

मरीजें ताई सेहत सुविधाएं च सुधार करदे होई सेहत ते मैडिकल शिक्षा मैहकमे नै प्रदेश दे सब्बने सरकारी मैडिकल ते डेंटल कालेजें च कम्मकाज दे ध्याड़ें ते समें च बाद्धा कीता ऐ। इक हुकमै मूजब इनें सब्बनें कालेजें च शनिवार गी छोड़ियै हर रोज उत्थें पुज्जने दा समा बडलै 9 बजे ते छुट्टी दा समां संजा 5 बजे होग। दपैहरी डेढ़ थमां 2 बजे तोड़ी रूट्टी खाने दा वक्फा मतलब लंच ब्रेक होवै करग। हुकमै च अग्गे आक्खेआ गोआ ऐ जे शनिवारें इनें अस्पताले च पुज्जने दा समां बडलै 9 बजे ते छुट्टी दपैहरी डेढ़ बजे होवै करग।

<><><><><><>

VP Students

उपराश्ट्रपति जगदीप धनखड़ होरें नमीं दिल्ली दे संसद भवन च धोलपुर राश्ट्रीय सेना स्कूल दे विद्यार्थिं कन्नै गल्लबात कीती। एह विद्यार्थी राज्यसभा आस्सेआ आयोजित त्रै रोजा अध्ययन सरबंधी दौरे आले कार्यक्रम च हिस्सा लै'रदे हे।

<><><><><><>

RS-Oath

कांग्रेस दियां वरिष्ठ नेता सोनिया गांधी ते केन्द्री मंत्री अश्विनी वैष्णव होरें अज्ज राज्य सभा सांसद दे रूपै च सगंध चुक्की। राज्यसभा दे चेयरमैन जगदीप धनखड़ होरें उनेंगी सगंध चुकाई। राज्यसभा आस्तै चुनाएं दे 12एं होरने सदस्यें गी बी सगंध चुकाई गई। इंदे च भाजपा दे आर.पी. एन. सिंह, जनता दल युनाइटेड दे संजय कुमार झा ते कांग्रेस दे अजय माकन बी शामिल हे।

<><><><><><>

Apurva ABHA

सेहत ते परोआर कल्याण मंत्रालय च सचिव अपूर्वा चन्द्रा होरें हर नागरिक गी आभा आईडी बनाने लेई आक्खेआ ऐ। उनें आक्खेआ जे केन्द्रीय कर्मचारी सेहत स्कीम योजना गी आयुष्मान भारत आभा आईडी कन्नै जोड़ने मगरा केन्द्र सरकार दे कर्मचारिं गी अपने सेहत सरबंधी रिकार्ड डिजीटल रखने च मदद होग ते उंदे आस्तै चीजां सौखियां होई जागंन।



Agni Prime

अग्नि प्राइम मिसाइल दा कल ओडिशा च सफल परीक्षण कीता गेआ। एह अजमाइश ओडिशा दे डॉ. ए.पी.जे.अब्दुल कलाम द्वीप थमां परीक्षण सामरिक बल कमान—एसएफसी ते रक्षा अनुसंधान ते विकास संगठन डीआरडीओ दे सैहयोग कन्नै कीती गई। रक्षा मंत्रालय मूजब नमीं पीढ़ी दी बैलिस्टिक मिसाइल अग्नि प्राइम नै अपने विश्वसनीय प्रदर्शन गी प्रमाणित करदे होई सारे परीक्षण उद्देश्यें गी पूरा कीता। रक्षा मंत्री राजनाथ सिंह होरें सफल आजमाइश लेई डीआरडीओ, एसएफसी ते सशस्त्र बलें गी बधाई दित्ती ऐ। उनें आक्खेआ जे मिसाइल दा सफल विकास ते ओहदा सेना च शामिल होना सशस्त्र बलें आस्तै महत्वपूर्ण साबत होग।



Read: Naresh Sharma & Shruti Khajuria

D.E.O. : Mukesh Gupta

Skilled : Tarsem

Editor : Ashok Kumar Mota

